

09 JUL 2003

LANGKAH MALAYSIA ANJUR MULTAQQA BOLEH DICONTOKI - PESERTA THAILAND

PUTRAJAYA, 9 Julai (Bernama) -- Negara Islam wajar mencontohi Malaysia yang mengambil inisiatif menganjurkan Multaqa Ulama Sedunia untuk membahaskan isu semasa yang dihadapi umat Islam dalam keadaan Islam tidak disenangi beberapa pihak.

Pengetua Sekolah Mahaad Tarbiah Bandar Patani, Thailand Ahmad Kamil Yusof berkata negara Islam lain perlu berani menunjukkan sikap yang sama supaya tindakan selaras dapat diambil bagi menangani permasalahan umat Islam.

"Alhamdulillah, Malaysia secara terang dan berani mengadakan persidangan mengenai Islam dengan masyarakat dan agama (Islam) yang kini apabila disebut, tidak disenangi oleh beberapa pihak," katanya kepada pemberita di sini.

Ahmad Kamil yang mewakili Persatuan Sekolah-sekolah Agama Patani, Thailand berkata umat Islam kini lebih banyak mendapat maklumat mengenai Islam dari Barat yang kesahihan laporannya tidak dapat dipastikan.

"Dengan adanya Multaqa ini, kita akan dapat mengetahui keadaan sebenar mengenai Islam dan ulama dapat mengambil tindakan selaras dalam menghadapi permasalahan pendidikan, ekonomi, politik dan sosial umat Islam," katanya.

Multaqa selama tiga hari itu akan dirasmikan oleh Perdana Menteri Datuk Seri Dr Mahathir Mohamad, esok.

-- BERNAMA

HM AZZ LAT